

Omellach el mora Rengeasek

Mlara President Boyd K. Packer

Merredel ra Chelechad ra Teruich ma Terung el Apostol

Ak blechoel mengedecheduch el mora rengeasek, el mengaisisiu ra klengeasek er ngak me kemu.

Kom kmal mekreos el diak a mengaisisiu er kemu. Ak mla mesekemiu ra betok el beluu ra beluulechad. Kom lemuut el ungil er sera le temam. Ng betok omodengei el kirel ebangkelio. Ko meklou el chad e mesisiich a klaumerang er kemu.

Chelechang okai ma euid a rekik. Kom locha melbedebek el kmo meng ngera sebechek el kudmeklii ra klengar re kemu. Ak mla ngar sel mngarngii e medengei el kmo ko merael bedul ker. Eng di kemu a dirkak bor sel kngarngii. A kmung a sesei el bades ra tal cheldecheduch:

A udelang el charm a merolang el mo soro.

Ea ngeasek el charm a diak.

Ngera ikel diak lodengei a ngeasek el charm

A udelang el charm a medengei a betok.

Meng medengei, ngikal uodel el charm

El Dirk medengei a betok ra ngeasek el charm.

Me ngera diak lodengei ngikal uodel el charm?

--Ng diak el sebechel mereched el suebek.

A ngeasek el charm a suebek er bab, me iou,

E meliuekl er ngikal soro e uodel el charm.

E ngera diak lodengelii ngikal mereched e ngeasek el charm?

--Ng diak lodengei el kmo ng mor.¹

Ng dimlak loluches er ngii a Wordsworth, eng di ng klou a belkul!

Ma rokui el teletael ngara beluulechad, luldimukl ra kekerei el belkul a ngarbab el llechul a kldung, e kemu el ngeasek a mukeroul ra chelsel a basio ra cherarou.

Chelsel chedaol llechukl e kede medengei el kmo ng mlarngii a mekemad ra babeluades ea Lucifer a mlo omtok, e ngii, ma rechedal, a “tilobed el mei er tial beluulechad.” ² Ngii a blak a rengul el melemall ra uldesuel a Chedam ra Babeluades e osiik el mo omtebechel a uldesued ma omerelled. Tial orrimel a chedaol, e ngii a di mekelkelii a beluelchad. ³

Meng uaisei el ngarnngii omtok, omelasem, ma ongetikaik, eng ding diak el kiriuk el mo medakt.

Sera lteruich ma euid a rekik. el tobedang ra high skuul el mle tang ra ungil ngalk ra skuul, e mle medengei el kmo, ngarnngii a chelitechetur, ea klengar kemam a mlengodech ra tal tutau ra Sandei. A bol kukuk ea ki mlokedong el mora auditorium ra skuul. A mlarabebul a tebel a kekerei el razio. A merredel ra skuul a urelii tial razio. Tiaikid ea ki rirngesii a ngerel a President Franklin Delano Roosevelt louchais el kmo a Pearl Harbor a blal debar. A Beluu ra Merikel a ngara mekemad lobengkel a Siabal.

Uriul e tial teletael a ulebelekel. El liluut a President Roosevelt, el ouchais el kmo a beluad a ngara mekemad lobengkel a Dois. A Ongerung el Mekemad a mla oberk ra beluulechad.

A klengar kemam a mlo diak desal medengelii. Ng dimlak ki modengei el kmo ngera mo duubech. Kede locha kiei el mo sebeched el mo bechiil e oungalk?

Chelechal sils e ngarnngii a mekemad ma oderngesel a mekemad ea beluulechad a ngara uldikel.⁴ Kemu, el ngeasek, a locha mo rrau a rengmu e mo bekikl el kirel a klengarkemu. Ng soak el mellach e olisechakl er kemu, e meskemu a uleklatk el kirel a bebil ra tekoi el bo moruul ma diak moruul.

A moktek ra ebangkelio a “klou el uldasou el kirel a deourreng.”⁵ A telungalk a moktek er tial uldasou. A telungalk a ultuil ra klikiid el usbechellel aikel klisiich el omeob a klengar el ngara bedengiu.

Chelsel “A Telungalk: Chais el mora Beluelchad,” el ngii a ulekrael tekoi el lultebedii a First Presidency ma Chelechad ra Teruich ma Terung el Apostol, e kede silubii ruchei ra demechell el kmo “a rokui el chad---sechal ma redil---[a] ulebeob el uaia teletelel a Dios. A derstang er tir a mekreos el ngalk ra reng el sechal ma redil el ngelekel a chedam ma chedil ra babeluades, me a, leuaisei, ea derstang er tir a ngarnngii chedaol teletelir ma blebelir. Sel klemedengei ra chad el kmo ng sechal malechub eng redil a klou a belkul e [milkedmokl ruchei ra demechell]....

“...Aki melemolem louchais el kmo a Dios a mla kmu el kmo sel chedaol klisiich el omeob a klengar a kirel dimekedmokl ra delongelet a sechal ma redil, el tir a ulterekokl el kaubuch.”⁶

Sel klou el kelebsengel a Lucifer ma rechedal a diak a techellir el mo nguu a bedengir ra tech.

A bebil ra ongetikaik el bom chebangel, el bebil er ngii aikel kmal oberraod, a uldimukl a bedengiu. Ng diak dil ngarngii a klisichiu el omeob a klengar ra beches el telcheroll, kom dirrek el ngarngii a lemeltiu el melilt.

A Profet Joseph Smith a ulsisechakl el kmo, “Rokui el klengar loba bedengir ra tech a ngarngii a mesisiich el klisichir er tirkel diak a bedengir ra tech.”⁷ Ma leuaisei ea rebek el chad el ngarngii a bedengir ra tech a lemuut el mesisiich a klisichir ra cherarou. Ke mora ringel ra ongetikaik el bedengem ra tech a uchul, eng di ngarngii a klisichem el mo mesisiich er ngii ma reanghel er ngii.

Ma kim tebedang ra high skuul, ete betok el kim dilak el ngara skuul a mlora mekemad, el bebil er tir a dimlak luut el mei. Ea rebebil er kemam a milengiil el mo soiseb ra klsoldau. Ng dimlak ki modengelii a tara klebesei er kemam. Ng locha diak ki mad er tial mekemad? Ng locha ngarngii a mo medechel ra ikel ki modengei sel kim luut?

Ma kmal mle ungil medengei el kmo ak mora klsoldau, mak siliseb ra air force. Ak dim le mereched el mora Santa Ana, California, el mora omesuub ra bekall ra skoki.

Ng dimlak a kmal mesisiich el klaumerang er ngak ra ebangkelio el kmong klemerang, eng di a resensei er ngak ra seminary el , Abel S. Rich ma John P. Lillywhite, a mle medengei el kmo ng klemerang. Ak mla rongesterir louchais, e uluumerang er tir. A kulemdasou el kmo, “Ak di ultuil ra klaumerang er tir el di merekmo bol ngarngii a klauemrang er ngak.” Meng mle uaisei.

Ak mla remenges el kirel a patriarchal blessing eng ding dirkak nguu a chimong. Chelsel a bek el stake e ngarngii a patriarch el mechedaol lobang a reng ra ulaoch ma reng ra ocholt. Ngii a di chimong el chad el meskid a berrotel el klengeltengat el mor tirkel tir a lekengei a rebisop er tir. Ak milluches el mora bisop er ngak el kirel a kengei.

A J. Roland Sandstrom a milchedaoi el patriarch el kiliei ra Santa Ana Stake. Ng dimlak a ngera lodengei el kirek ma dirkak a tal bla lesekak, engdi ng mileskak a klengeltengat. Chelsel tial klengeltengat eak miltik a nger ma kirek el meruul.

Meng uaisei el berrotel a patriarchal blessing, eng di msall e kuuchais er kemuu a di kedeb el bades er ngii: “Ke mo mukrael lokiu a ngerel Chedaol reng e mo muklatk el kirel a kengaol. Alsekum e koltirakl aikal uleklatk, ea Demad ra Babeluades a mo omekngeltengat er kau meng mo sebechem el muut el mo obengterir a rebetik ra rengum.”⁸

Sel tekoi el *alsekum*, el kmal kekerei llechukl, a uaia blol klou a belkul el mei er ngak. Ak mo ngeltengat el muut el mo remei *alsekum* a kultirakl a llach e dirrek *alsekum* a kurrenges ra odbechel Chedaol Reng. Meng uaisei el tial sengk a blak nguu ra taem ra

techolb e chelid, eng ding dimlak bo kudengelii Chedaol Reng malechub a teletelel a urerel.

Ak miltik er sel mle kirek el mo medengelii el kirel odbechel a reng ra chelsel a Babier ra Mormon. Ak chiliui el kmo a “reanghel a mengedecheduch loba klisichel Chedaol Reng; ma uchul, ete melekoi a tekingel a Kristo. Mi sei a uchul eak melekoi el kmo.... Bo medinges ra tekingel a Kristo; ele, a tekingel a Kristo a mo olecholt er kau aikel rokui el kiriuk el meruul.”⁹

A kumdasou e sel chimol tekoi el ksilubii ra Babier ra Mormon a kmo a ngerel a Reng a mei el *domelchesiu* er ngii ng diak el ngor. Ke mo medengelii, el uaia ngak, el mo “orrengees er sel ngor el ngii *omomelchesiu* er ngii e bai diak *mrengesii*.

A Nephi a ulengeroel ra ruchelet el kmo, “Kemiu a mla mesang a anghel, eng mla mengedecheduch er kemiu; oi, kom mla rongesii a lebebil ra taem; el mengelulau lekor kemiu el kekerei a ngerel, eng di kemiu a mla mo diak *molchesuar*, meng dikea el sebechemiu el mo *melchesiu* a tekingel.”¹⁰

Bebil ra rechad ra mondaia kmo aikang a diak el merang el bades ele kau *orrengees* a tekoi, ng diak *momelchesiu*. Eng di alsekum e ngarngii a klemedengei er kau ra chedaol cheldecheduch, eke medengei el kmo a kot el ungil omesodel a teletael a tekoi el *omelchesiu*.

A sengk ra Chedaol Reng, alsekum eke kongei, eng mo omekrael e omecheliu, e dirrek el sumechokl a blekerdelem. Ng chedaol ngor el mei ra bdelum el uldasou malechub eke *omelchesiu* er ngii ra chelsel a rengum. A Profet Enos a kmul kmo a “ngerel a Rubak a mlei ra uldesuel.”¹¹ Ea Rubak a kmu ra Oliver Cowdery el kmo ng mo ouchais el mora uldesuel ma rengul, lokiua Chedaol Reng, el ngii a bo lobang.¹²

Ng diak el belkul a kmo kom ngar tial klengar el diak bo mruul a chelbirukel, eng ding diak bom moruul a meklou el chelbirukel el diak a uleklatk ra Chedaol Reng lekor kau el kot. Tial yaksok a mora rokui el chedal a Ikelesia.

A rebebil a mo remuul a kmal meklou el mekngit, el ooit a llach ra ebangkelio. Tiaikid eng taem el kumeklatk er kemiu el kirel a Tngakireng, ouuchel el reng, ma mui el klausubes el mor sel ngii omluut el mo klikiid. A Rubak a mla kmu el kmo, “Sel bla douchel a rengud ra kngtid, eke de mousubes, ea Rubak a diak el luut el melbedebek a kngtid.”¹³

Alsekum ea cherarou a ngoikau lokiua klengit, ea kumeklatk er kemiu el kmo morkedii sel kiis el mekengii a chesmerel a kelebus ra chelsem. Ng sebechem el mo beches lokiua a tngakireng ra Osobel el Jesus Kristo.

Ng locha morngii a taem eke omdasou el kmo ng locha diak mkliiid el mo suobel ele kau el mla ruebet re klengit, meklou ma mekekerei, e omdasou el kmo ke mla remiid. Tiang a *diak a tal* bol klemerang! Ng di tal ouchel reng a sebechel mkerur sel ngii a ringel. Eng di ouchel el reng a *sebechel* mkerur sel ringel, el diak el iior ra kmong ngerang.

Alsekum e ke kora meruul aikel ngii a diak el kirem el meruul, malechub eke teloi ra rechad el tir a mengurs er kau el mora chelbirukel, tiaikid a taem el moterkeklaau, e ousbech ra lemeltem el melilt. Morrenge ra ngerel Chedaol Reng, e kau a diak bom rebet.

Mak lemuut el kmul kmo a rengeasek er chelechal sils a mukeroul ra basio ra cherarou el ngesonges aikel ngarbab el osisechakl ra kldung. Eng di ngak el mesiungel a Rubak, eak yaksok er kemiui el kmo ko mo ngara selbechakl e ucheliu ra odeckelakl ra cherarou alsekum ko morrenge ra Chedaol Reng.

Bo mungil oubail; mngara omengull omongedecheduch; morrenge a ungil chelitakl. Mongeroid er kau ra rokui el tekoi ra deleboes ma ngii dil mekngit lomeruul. Bo mulserochel a klengar kau e bo mesisiich ra klaumerang. Aki mui el ousbech er kemiui, me ko mo ngmai ongaisreng el klengeltengat. A Chedam ra Babeluades a di blechoel lomes er kau.

A klisichel a klaumerang er ngak a mla mengodech er sel taem el ble kultuil ra klaumerang ra resensei er ngak ra seminary. Chelechal sils eak di ultuil ra rebebil el cheluodel a uchul ma dirrek el secher ra polio el kngiluu ra kekerei eng di diak kumededenger el kirel a chedaol tekoi. Ak mla mo oumerang, e medengei, aikel mekreos el klemerang ra ebangkelio ma Osobel el Jesus Kristo.

Me ngak el tara tokubets el sioning er Ngii, ea kuuchais el kmo a mo ulebengelel tial mekemad el ulemuchel ruchei ra demechell a diak lak dodengelii. A Lucifer a mo make.

Kede milsaod a charm ruchei. Kemiui el ngeasek a diak a belkul el msebek el mong e mei, el diak modengelii a rael el ngar medemiu. Ngarngii tirkel medengelii a rael. Ng klemerang el Rubak el Dios a diak a ngera el bo loruul, ng bai di ocholt aikel bertelet el mora remesiungel el profet. [14](#) A Rubak a kudmeklii a Iklesia er Ngii el ultuil ra osisechakl ma omellach.

Sel btelul a Ikelesia ete ngarngii a reteruich ma teim el chad el mla moterekokl el profet, chad ra ues, ma ocholt. A derstang el chedal a First Presidency ma Teruich ma Terung el Apostol a olab aikel rokui el kiis ra priesthood el meklou a belkul kirel orretel a Ikelesia. Ngkel ngarbab el Apostol a Profet---el President Thomas S. Monson, el ngii a di chimol

chad el sebechel lolab aikel rokui el kiis.

A chedaol llechukl a ouchais el kmo a First Presidency ma Chelechad ra Teruich ma Terung a dmak el oureor ea uldasou longedmokl a kirel tabesul a kengei er ngii ra rebek el chad. Me tiaikid a teletael. Aki umerang ra Rubak el mo omekrael ra rael e osiik el meruul aikel Ngii a soal. Aki medengei el kmo Ngii a mla oterkeklii a mesisiich el klaumerang er kemam, a derstang el chad ma rebek el chad.

Ng kiriu el mesuub el mo umerang ra Rubak loba rengum el rokir; e diak multuil ra di klemedengei er kau. [15](#) Ng kiriru el mo ngara klemerang el mo iiliuekl ra resechelei el tir a sorir el mo uaia kemi.

Bebil ra taem e kom locha mo mechetikaik el kuk mo omdasou a ngodech el uaia ngak er sera kngeasek: “Me ngultuil ra teletael er chelechal taem, ea beluulechad a mo nguemed. A ulebengelel a beluulechad a mei ruchei ra kreui aikel kirek el meruul.” Tiang a diak el merang! Ke bai omes el bedul uchei e meruul aikel ngii a llemalt---mo bechiil, morngii a telungalk er kau, mesterir a rengelekem ma rengelekir a rengelekem, ma locha rengelekir a rengelekir a rengelekem.

Alsekum e kom oltirakl aikal osisechakl, e ko mo ngara ucheliu ma selbechakl el teletael e kau a medengelii loki a odbechel Chedaol Reng er sel kirem el morngii, “ele ngoeak a klisichel Chedaol Reng e kau a mo medengei a klemerang ra rokui el tekoi.” [16](#) Ak yaksok er kemi el kmo ng mo uaisei.

Uleklatk

1. John Ciardi, “Fast and Slow,” *Fast and Slow* (1975), 1.
2. Ocholt 12:9; dirrek el mesa Doctrine and Covenants 76:25--26.
3. Doctrine and Covenants 52:14.
4. Doctrine and Covenants 45:26.
5. Alma 42:8.
6. “A Telungalk: Chais el mora Beluulechad,” *Liahona* ma *Ensign*, Nov. 2010, 129.
7. *Teachings of Presidents of the Church: Joseph Smith* (2007), 211.
8. Patriarchal blessing ra Boyd K. Packer, Jan. 15, 1944, 3.
9. 2 Nephi 32:3.
10. 1 Nephi 17:45; smisichii a belkul.
11. Enos 1:10.
12. Mesa Doctrine and Covenants 8:2.
13. Mesa Doctrine and Covenants 58:42.
14. Amos 3:7.
15. Proverbs 3:5.
16. Moroni 10:5.